



Bosnia and Herzegovina
Federation of Bosnia and Herzegovina

CANTON SARAJEVO
Government

Broj: 02-04-5140-27.1/24
Sarajevo, 22.02.2024. godine

SMJERNICE ZA TROGODIŠNJE PLANIRANJE RADA KANTONA SARAJEVO ZA PERIOD 2025.-2027. GODINA

Uvod - svrha smjernica

Izrada Smjernica za trogodišnje planiranje rada Kantona Sarajevo za period 2025.-2027. (u daljem tekstu: Smjernice) proizilazi kao obaveza iz člana 10. Uredbe o trogodišnjem i godišnjem planiranju rada, monitoringu i izvještavanju u Federaciji BiH („Službene novine Federacije BiH“ broj 74/19 i 2/21) (u daljem tekstu: Uredba).

Smjernice predstavljaju osnovu za planiranje kantonalnih organa uprave u naredne tri godine, kako bi se na adekvatan način uključili razvojni prioriteti koji su definisani Strategijom razvoja Kantona Sarajevo 2021.-2027., Okvirom za implementaciju ciljeva održivog razvoja u BiH i drugim relevantnim dokumentima. Smjernice imaju za cilj da potenciraju ključne aktivnosti koje je neophodno poduzeti u narednom planskom ciklusu, a koje imaju sinergijski efekat za više oblasti društveno-ekonomskog i okolišnog, prostornog života Kantona.

Uredbom su propisani minimalni elementi Smjernica, a iste se izrađuju svake godine za period od tri godine i pripremaju se u skladu sa strateškim dokumentima relevantnim za Kanton Sarajevo. Minimalni elementi Smjernica su oznaka nivoa za koji se izrađuju i period na koje se odnosi, uvod sa opisom svrhe Smjernica i kratkim opisom razvojnog konteksta, uključujući izazove i rizike, zatim strateške pravce, odnosno smjerove razvoja koji proizlaze iz strateškog dokumenta kantona, te drugih relevantnih strateških dokumenata viših nivoa vlasti, relevantnih dokumenata iz procesa evropskih integracija i međunarodno prihvaćenih ciljeva održivog razvoja, te prioritete, mjere i strateške projekte, kao i indikativni strateški okvir i odgovarajuće indikatore strateških ciljeva.

Pored toga što predstavljaju usmjerenje za budući rad organa uprave, Smjernice služe i ostalim zainteresovanim stranama (vaninstitucionalnim akterima) kao vodilja za planiranje i implementaciju konkretnih projekata i aktivnosti u narednom trogodišnjem periodu.

Kratak osvrt na opći razvojni kontekst Kantona Sarajevo uključujući izazove i rizike

Kanton Sarajevo na području Federacije BiH se pokazuje kao značajno područje koncentracije ekonomskih potencijala (stanovništvo, zaposlenost, nezaposlenost), kao i efekata razvijenosti (stepen zaposlenosti, obim vanjsko-trgovinske razmjene). To je najveći obrazovni, zdravstveni i turistički centar u Federaciji BiH. U 2022. godini prema indeksu razvijenosti od 2,04 Kanton Sarajevo je iznad prosjeka razvijenosti Federacije BiH i rangiran je na prvo mjesto u Federaciji BiH. Iako je Kanton Sarajevo teritorijalno jedan od manjih kantona, u njemu živi 419.543 stanovnika, sa prosječnom



gustinom naseljenosti od 328,5 st/km² što ga čini najgušće naseljenim kantonom u FBiH, odnosno skoro 4 puta iznad prosječne gustine naseljenosti FBiH. Kanton Sarajevo se u Federaciji BiH pokazuje kao kanton sa najizraženijim demografskim karakteristikama. U tom smislu, Kanton Sarajevo je jedini kanton u FBiH sa pozitivnom stopom rasta stanovništva, kao i stopom rasta mladog stanovništva, te jedini kanton koji bilježi pozitivan migracijski saldo.

Broj zaposlenih u Kantonu Sarajevo u 2022. godini je iznosio 156.488, što je za 2,6% veći broj u odnosu na prethodnu godinu. Step en registrovane zaposlenosti ukupnog stanovništva je 37,3% i u odnosu na 2021. godinu bilježi porast za 2,6%. Analiza zaposlenosti po djelatnostima/područjima Klasifikacije djelatnosti (KD 2010) u 2022. godini, pokazuje da je najveći broj zaposlenih u oblasti trgovine (18,2%) i oblasti javne uprave i socijalnog osiguranja (10,6%). U odnosu na prethodnu godinu, najviše je porastao broj zaposlenih u oblasti Vađenje ruda i kamena (27,0%) i Informacije i komunikacije (10,2%).

Krajem 2022. godine u Kantonu Sarajevo ukupno je registrirano 55.506 nezaposlenih lica što je za 4,2% manje nego prethodne godine. Stopa nezaposlenosti aktivnog stanovništva u Kantonu Sarajevo, u 2022. godini je iznosila 26,1%, i u odnosu na 2021. godinu smanjena je za 5,3%. U 2022. godini je bilo 11.120 nezaposlenih mladih (životna dob 15-30 godina starosti) sa učešćem od 20,0% u ukupnom broju nezaposlenih osoba. Ukupan broj nezaposlenih mladih u 2022. godini se smanjio za 9,7% kao i broj ukupno nezaposlenih za 4,2%.

Prosječna neto-plaća isplaćena u Kantonu Sarajevo krajem 2022. godine iznosila je 1.390 KM i veća je 11,1% u odnosu na prethodnu, 2021. godinu.

Obim vanjskotrgovinske razmjene u 2022. godini ostvaren je u iznosu od preko 8,9 milijardi KM i veći je za 32,7% nego prethodne godine. Pokrivenost uvoza izvozom je 28,2% i manja je za 12,9% u odnosu na 2021. godinu.

Broj turista u 2019. godini je zabilježio najveći broj u posmatranom periodu (667.756), odnosno periodu prije pandemije. Nakon brojnih lock-downova, broj turista se smanjio, u 2020. godini čak za oko 80% u odnosu na period prije COVID-a 19.

Kanton Sarajevo u 2022. godini posjetilo je ukupno 568.570 turista, bilježi rast za 67,5% više posjeta nego u prethodnoj godini, pri čemu je povećanje broja stranih turista iznosilo za preko četiri puta više. Povećanje ukupnog broja turista u 2022. godini u odnosu na prethodnu godinu bilježe sve općine Kantona Sarajevo.

Broj djece u predškolskim ustanovama bilježi značajno povećanje u 2022. godini taj broj iznosi 7.567 što bilježi rast za 22,4% u odnosu na prethodnu godinu. Izdvajanje iz Budžeta za obrazovanje u 2022. godini je zabilježilo smanjenje za 0,20% u odnosu na prethodnu godinu. Broj učenika osnovnog obrazovanja bilježi blago povećanje iz godine u godinu, kao i broj učenika srednjeg obrazovanja. Broj studenata u 2022. godini se povećao za 172 studenta.

Prosječno mjesečno izdvojena sredstva iz Budžeta po korisniku zaštite po zakonu (korisnici socijalne zaštite, civilnih žrtava rata i zaštite porodica sa djecom) u 2022. godini povećala su se za 9,6% u odnosu na prethodnu godinu. Udio nezaposlenih demobilisanih branilaca, članova porodica poginulih branilaca, ratnih vojnih invalida i ostalih invalida u ukupno nezaposlenim bilježi povećanje u 2022. godini.

Prema evidenciji Zavoda zdravstvenog osiguranja Kantona Sarajevo na dan 31.12.2022. godine na obavezno zdravstveno osiguranje bilo je prijavljeno 428.090 osiguranih lica, što je za 0,8% više osiguranika u odnosu na stanje iskazano na isti dan prethodne godine.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-000, Fax: + 387 (0) 33 562-076
Web: <http://vlada.ks.gov.ba>, E-mail: vlada@vlada.ks.gov.ba

2/7

Prosječne godišnje koncentracije zagađujućih materija SO₂ i PM_{2,5} pokazuju značajno smanjenje u odnosu na 2021. godinu, međutim vrijednosti i dalje prekoračuju Pravilnikom o načinu vršenja monitoringa kvaliteta zraka i definiranju vrsta zagađujućih materija, graničnih vrijednosti i drugih standarda kvaliteta zraka („Službene novine Federacije BiH“, broj 1/12, 50/19 i 3/21) propisane granične vrijednosti.

Zaštita okoliša, prostora, prirodnih i infrastrukturnih resursa u poslijeratnom periodu nije bila prioritetno pitanje za tranzicijsku zemlju kakva je Bosna i Hercegovina, dok u posljednjih par godina svijest o zaštiti i poboljšanju okoliša iz godine u godinu se mijenja na bolje.

Strateški pravci razvoja Kantona Sarajevo

Izdvajanjem perspektivnih konkurentskih prednosti s jedne strane i najkritičnijih problema s druge strane, te na osnovu urađene interne kvantitativne i kvalitativne analize stanja u Kantonu Sarajevo, identificiranih internih snaga i slabosti (vezanih za resurse, organizaciju ili rezultate rada), kao i prilika i prijetnji u užem i širem okruženju Kantona, općih zaključaka vezanih za ekonomski i društveni razvoj Kantona, javnu administraciju, infrastrukturu i stanje okoliša, Strategija Kantona Sarajevo je definisala nekoliko ključnih strateških fokusa sa kojima će se Kanton Sarajevo morati suočiti u narednim godinama, i to:

1. Funkcioniranje sistema zapošljavanja i konkurentnost privrede
2. Dostupnost, kvalitet i održivost javnih usluga (zdravstvo, obrazovanje, socijalne politike, kultura i sport);
3. Okoliš i javna infrastruktura u funkciji održivog razvoja i podizanja kvaliteta života ljudi;
4. Efikasnost i odgovornost unutar javnog sektora.

Vizija oslikava težnju Kantonu Sarajevo da postane savremena evropska regija, orijentirana na održive aspekte razvoja, gdje se razvoj posmatra kao višedimenzionalan proces ekonomske, društvene, okolišne, prostorne i institucionalne transformacije s ciljem poboljšanja kvaliteta i standarda života građana.

VIZIJA RAZVOJA KANTONA SARAJEVO

„Kanton Sarajevo je evropska, dinamična i kreativna regija, prosperitetna za građane svih generacija, ugodnog življenja i unosnog poslovanja“

Na temelju strateških fokusa i vizije Kantona Sarajevo definirana su četiri strateška cilja koji osiguravaju sinergijske efekte između ekonomije, okoliša i društva, uz puno uvažavanje interesa lokalne uprave. Oni imaju prepoznatljiva sektorska težišta, ali istovremeno su integralni i povezujući. Strategija razvoja Kantona Sarajevo definisala je slijedeće strateške ciljeve:

1. Unaprijediti konkurentnost privrede i povećati zaposlenost;
2. Stvoriti uvjete za uključujući društveno-ekonomski rast i smanjenje siromaštva i unaprijediti dostupnost i pouzdanost svih javnih servisa (zdravstvo, obrazovanje, socijalne politike, kultura i sport);
3. Odgovorno upravljati okolišem, prostorom, prirodnim i infrastrukturnim resursima;
4. Unaprijediti efikasnost i odgovornost javnog sektora.

Kako bi se unaprijedila konkurentnost privrede i povećala zaposlenost, potrebno je kreirati okruženje poticajno za poslovanje, jačati konkurentnost i izvoznu orijentaciju poslovnih subjekata s posebnim fokusom na prerađivačku industriju, povećati digitaliziranost ekonomije, unaprijediti sistem



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-000, Fax: + 387 (0) 33 562-076
Web: <http://vlada.ks.gov.ba>, E-mail: vlada@vlada.ks.gov.ba

zapošljavanja i povećati efikasnost tržišta rada, kao i osigurati dugoročnu održivost i funkcionalnost javnih preduzeća, te unaprijediti konkurentnost destinacije kroz održivi razvoj turizma i jačati konkurentnost ruralne ekonomije.

Da bi se realizirao 2. strateški cilj, potrebno je podići kvalitet obrazovanja (s posebnim naglaskom na STEM i digitalne vještine) i uskladiti ga sa zahtjevima tržišta rada i potražnjom za radnom snagom, poboljšati kvalitet i dostupnost socijalnih prava i usluga za sve ciljne grupe stanovništva, kao i smanjivati siromaštvo i socijalnu isključenost, s posebnim akcentom na vanredne okolnosti, kao i unaprijediti funkcionalnost i odgovornost zdravstvenog sistema Kantona Sarajevo, te ambijent za razvoj kulture i sporta.

Za realizaciju trećeg strateškog cilja potrebno je poboljšati kvalitet zraka i zaštitu od buke, održivo koristiti prirodna dobra štiteći biološku i geološku raznolikost, kao i uspostaviti integralni održivi sistem upravljanja otpadom i unaprijediti razvoj saobraćaja i javne komunalne infrastrukture.

Kako bi se ostvario 4. strateški cilj, potrebno je, prije svega, smanjiti korupciju i kriminalitet, povećati sigurnost građana, te osnažiti funkcioniranje pravne države, povećati učinkovitost i odgovornost u oblasti javnih finansija, reformirati javnu upravu, te unaprijediti sistem upravljanja razvojem i pozicionirati Kanton Sarajevo u široj regiji i Evropi.

Stepen realizacije definiranih strateških ciljeva pratit će se kroz nekoliko ključnih indikatora/pokazatelja utjecaja, na osnovu kojih će se moći ocijeniti stepen promjena u Kantonu Sarajevo u narednom, Strategijom definiranom, planskom periodu.

Indikatori utjecaja po strateškim ciljevima

Strateški cilj	Pokazatelj utjecaja	Početna vrijednost	Ciljana vrijednost
1. Unaprijediti konkurentnost privrede i povećati zaposlenost	Broj zaposlenih	152.394	200.000
	Prosječna plaća	1.153	1.350
	Indeks razvijenosti	2,03	2,7
2. Stvoriti uvjete za uključujući društveno-ekonomski rast i smanjenje siromaštva i unaprijediti dostupnost i pouzdanost svih javnih servisa (zdravstvo, obrazovanje, socijalne politike, kultura i sport)	Stopa smrtnosti dojenčadi (u ‰)	9,9	6
	Stopa završavanja škole (osnovna, srednja, fakultet)	90,2	100
	Stepen socijalne isključenosti stanovništva (%)	44,7	40
3. Odgovorno upravljati okolišem, prostorom, prirodnim i infrastrukturnim resursima	Gubici vode ViK-a (tehnički i administrativni) (%)	71,03	60
	Količina ukupno odloženog otpada (t/god)	161.086	220.000
	Broj dnevnih prekoračenja graničnih vrijednosti PM ₁₀ – Otoka	93	50
	Prosječna godišnja koncentracija PM _{2,5} (µg/m ³) – Ilidža	46	25
4. Unaprijediti efikasnost i odgovornost javnog sektora	Budžet KS/pc (KM)	2.163	2.500
	Kapitalna ulaganja iz Budžeta KS/pc (KM)	178	200
	Rang – grad prema kvaliteti života	156	140



Prioriteti, mjere i strateški projekti

Za uspješnost implementacije Strategije razvoja Kantona Sarajevo 2021.-2027. doprinijet će i aktivnosti na implementaciji sljedeća 32 strateška projekta kao intervencija od najvećeg značaja za ostvarenje strateških ciljeva planiranih Akcionim planom 2025.-2027.:

1. Program finansijske podrške za malo i srednje preduzetništvo;
2. Podrška razvoju privrednih i industrijskih zona;
3. Aktivacijski programi (paketi podrške) usmjereni na dugoročno nezaposlene obeshrabrene i osobe sa otežanim pristupom tržištu rada (žene, mladi, osobe bez kvalifikacija i/ili radnog iskustva, 55+ osobe, pripadnika demobilizirane boračke populacije, nezaposlene iz domaćinstava u kojima je više od dvije osobe nezaposlene i sl.);
4. Uspostava nove organizacione strukture na nivou komunalnog sektora - Holding komunalne privrede u Kantonu Sarajevo;
5. Implementacija jedinstvenog informacionog sistema za sva komunalna preduzeća;
6. Poboljšanje turističko-resursne osnove Olimpijskih planina Igmana i Bjelašnice;
7. Podsticaji u poljoprivrednoj proizvodnji;
8. Očuvanje, unapređenje, zaštita i reprodukcija šumskih ekosistema;
9. Povećanje obuhvata djece predškolskim odgojem i obrazovanjem u Kantonu Sarajevo;
10. Unapređenje infrastrukturnih kapaciteta iz oblasti osnovnog obrazovanja;
11. Sufinansiranje programa i projekata nauke;
12. Zaštita porodica sa djecom (dječiji dodatak, jednokratne novčane pomoći, dodatna novčana pomoć u prehrani djeteta do 6 mjeseci, naknada plaće ženi - majci do 1 godine koja je u radnom odnosu, dodatna pomoć na ime brige i njege djeteta ženi-majci koja ostvaruje pravo na naknadu plaće, dodatna pomoć na ime brige i njege djeteta ženi-majci koja nije u radnom odnosu i zdravstvena zaštita za djecu);
13. Podrška mladima u rješavanju stambenog pitanja;
14. Podrška starijim osobama (Gerontološki centar);
15. Stambeno zbrinjavanje i uspostavljanje systemske podrške braniteljskoj populaciji;
16. Izgradnja, rekonstrukcija i opremanje Javnih zdravstvenih ustanova Kantona Sarajevo;
17. Podrška razvoja i sufinansiranje kapitalnih projekata iz oblasti kulture;
18. Unapređenje održivog sistema i sufinansiranje kapitalnih projekata iz oblasti sporta;
19. Daljinsko grijanje u Kantonu Sarajevo;
20. Program aktivnosti na sanaciji i izgradnji Regionalnog centra za upravljanje otpadom „Smiljevići“;
21. Ulaganje u infrastrukturu i vozila javnog linijskog prijevoza putnika;
22. Izgradnja primarnih gradskih saobraćajnica;
23. Izgradnja tunela Kobilja Glava i dionice od tunela do spoja na M18 u naselju Hotonj;
24. Rekonstrukcija i sanacija vodovodne mreže u KS i sanacija prioriternih dijelova vodovodnog sistema;
25. Višenamjenski projekat Crna Rijeka;
26. Unapređenje prikupljanja komunalnog otpada;
27. Unapređenje rada komunalnih pogrebnih usluga;
28. Privođenje zemljišta krajnjoj namjeni na PJ Hrasno - Izgradnja poslovnog kompleksa;
29. Privođenje zemljišta krajnjoj namjeni na PJ Vogošća - Izgradnja stambeno-poslovnog kompleksa;
30. Izgradnja novog objekta za potrebe Ministarstva unutrašnjih poslova Kantona Sarajevo;
31. Nabavka helikoptera i formiranje helikopterske jedinice;
32. Nabavka opreme za potrebe Uprave policije.

Posmatrajući plan za naredne tri godine uočeno je da će se najviše voditi računa o projektima sistema zapošljavanja i efikasnosti tržišta rada. U tom smislu kroz Prioritet 1.4., odnosno Mjeru 1.4.2.



Adresa: Reisa Džemaludina Čauševića 1, 71 000 Sarajevo

Tel: + 387 (0) 33 562-000, Fax: + 387 (0) 33 562-076

Web: <http://vlada.ks.gov.ba>, E-mail: vlada@vlada.ks.gov.ba

5/7

Aktivirati dugoročno nezaposlene osobe i povećati efektivnu ponudu radne snage planirano je oko 122 miliona KM za period 2025.-2027. Za osiguranje dugoročne održivosti i funkcionalnosti javnih preduzeća planirano je oko 83 miliona KM. Također, kroz prioritet 1.7., vodit će se računa o jačanju konkurentnosti ruralne ekonomije (preko 75 miliona KM).

Veliki dio sredstava je planiran za realizaciju podizanja kvaliteta obrazovanja (sa posebnim naglaskom na STEM i digitalne vještine) i uskladiti ga sa zahtjevima tržišta rada i potražnjom za radnom snagom i to kroz mjere koje se odnose na unapređenje kvalitete usluga predškolskog vaspitanja i obrazovanja uz veći obuhvat djece predškolskim obrazovanjem, unapređenje kvaliteta cijelog sistema obrazovanja kroz unapređenje kadrovskih i infrastrukturnih kapaciteta obrazovnih institucija, osavremenjivanje nastavnih planova i programa, uspostavu podrške talentovanim učenicima uz saradnju sa svim vanjskim lokalnim akterima, te međunarodnim akterima, te unapređenje podrške istraživačko-razvojnim aktivnostima/projektima. Prioritet 2.3 koji se odnosi na unapređenje funkcionalnosti i odgovornosti zdravstvenog sistema, kao i prioritet 2.4 unapređenje ambijenta za razvoj kulture i sporta bilježe značajna sredstva za realizaciju i to preko 150 miliona KM. Također, veliki iznos za realizaciju je planiran za prioritet koji se odnosi na poboljšanje kvaliteta i dostupnosti socijalnih usluga za sve ciljne grupe stanovništva, kao i smanjenje siromaštva i socijalnu isključenost, sa posebnim akcentom na vanredne okolnosti (oko 300 miliona KM).

Kroz Strateški cilj 3. koji se odnosi na Odgovorno upravljanje okolišem, prostorom, prirodnim i infrastrukturnim resursima planirana su najznačajnija sredstava, a samim tim i najveća od svih ciljeva Strategije (preko 740 miliona KM).

Najviše planiranih sredstava se odnose na prioritete poboljšanja kvaliteta zraka i zaštitu od buke i unapređenje razvoja saobraćaja i javne komunalne infrastrukture (oko 690 miliona KM).

Značajan dio planiranih sredstava se odnosi na realizaciju mjera za povećanje energijske efikasnosti i podsticanje korištenja obnovljivih izvora energije, kao uspostavljanje integralnog održivog sistema upravljanja otpadom, te unapređenja i poboljšanja kvaliteta usluge vodosnabdijevanja i tretman otpadnih voda.

Veliki dio sredstava planiran je za projekte koji se odnose na unapređenje sigurnosti građana (MUP, migrantska kriza, saobraćajna sigurnost, maloljetnička delikvencija...), unapređenje sistema zaštite i spašavanja (civilna zaštita, vatrogasci, Gorska služba spašavanja...), te za projekte reformu javne uprave i povećanja učinkovitosti i odgovornosti u oblasti javnih finansija.

Planirana sredstva za smanjenje korupcije i kriminaliteta, povećanje sigurnosti građana, te osnaživanje funkcioniranja pravne države, povećanje učinkovitosti i odgovornosti u oblasti javnih finansija, kao i za reformu javne uprave su oko 60 miliona KM.

Indikativni finansijski okvir za period 2025.-2027.

Okvirna potrebna sredstva za realizaciju Strategije razvoja Kantona Sarajevo 2021.-2027. procijenjena su na 2.031.781.102 KM, a tokom perioda 2025.-2027. predviđena finansijska sredstva za realizaciju planiranih projekata iznose 1.662.001.968 KM, odnosno 81,8% od ukupno potrebnih sredstava za realizaciju Strategije.

Finansijska sredstva (u KM) potrebna za realizaciju strateških ciljeva tokom 2025.-2027. data su u narednoj tabeli:

Strateški cilj	2025	2026	2027	Ukupno	Ukupno	AP 25-27/
				2025-2027	2021-2027	ukupno 21-27 (%)
1	116.442.589	109.251.517	108.159.517	333.853.623	285.056.000	117,1
2	209.663.850	173.531.902	174.450.053	557.645.805	429.955.268	129,7
3	354.887.059	236.749.431	112.811.000	704.447.490	1.224.109.834	57,5



Adresa: Reisa Džemaludina Čauševića 1, 71 000 Sarajevo
 Tel: + 387 (0) 33 562-000, Fax: + 387 (0) 33 562-076
 Web: <http://vlada.ks.gov.ba>, E-mail: vlada@vlada.ks.gov.ba

4	56.340.850	7.584.600	2.129.600	66.055.050	92.660.000	71,3
UKUPNO	737.334.348	527.117.450	397.550.170	1.662.001.968	2.031.781.102	81,8

Planirana sredstva u iznosu od 1.662.001.968 KM, za period 2025.-2027. godina, najviše se odnose na projekte Strateškog cilja 3 (42,4%), zatim Strateškog cilja 2 (33,6%), te Strateškog cilja 1 (20,1%) i na Strateški cilj 4 (3,9%).

Posmatrajući prema strukturi finansiranja u periodu 2025.-2027. od ukupno planiranih 1.662.001.968 KM, iz Budžeta Kantona Sarajevo se planira finansirati 1.030.246.827 KM, odnosno 62,0%, sredstava jedinica lokalne samouprave (Grad Sarajevo i općine Kantona Sarajevo) u iznosu od 129.170.800 KM ili 7,8%, te 502.584.341 KM iz Drugih izvora finansiranja (kredit, budžeti viših nivoa vlasti, fondovi, grantovi, donacije...) što je 30,2% od ukupno planiranih sredstava.

Ako posmatramo konkretno strukturu drugih izvora finansiranja Akcionog plana 2025.-2027., najznačajniji su krediti, Javna ustanova Služba za zapošljavanje Kantona Sarajevo, EU fondovi, vlastita učešća Kantonalnih javnih komunalnih preduzeća i Javnih komunalnih preduzeća, primitci, Zavod zdravstvenog osiguranja Kantona Sarajevo, Budžet Federacije BiH, grantovi, UNDP i drugi.

U prilogu je dat kompletan materijal Akcioni plan 2025.-2027. implementacije Strategije razvoja Kantona Sarajevo 2021-2027., gdje su detaljno navedeni svi projekti i aktivnosti koji se planiraju implementirati ili eventualno za neke projekte započeti realizaciju u navedenom planskom periodu.



PO OVLASTENJU PREMIJERA

ministrica Sofije Kadenić Darja

Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),
3. Premijer Kantona Sarajevo,
4. Zavod za planiranje razvoja Kantona Sarajevo,
5. Ministarstva Kantona Sarajevo (12x),
6. Službe Kantona Sarajevo (9x),
7. Samostalne kantonalne uprave (2x),
8. Samostalne kantonalne upravne organizacije (4x),
9. Privredna komora Kantona Sarajevo (putem Zavoda za planiranje razvoja Kantona Sarajevo),
10. Sarajevska regionalna razvojna agencija (SERDA) (putem Zavoda za planiranje razvoja Kantona Sarajevo),
11. Udruženje poslodavaca Kantona Sarajevo (putem Zavoda za planiranje razvoja Kantona Sarajevo),
12. Evidencija,
13. A r h i v a.



Adresa: Reisa Džemaludina Čauševića 1, 71 000 Sarajevo
 Tel: + 387 (0) 33 562-000, Fax: + 387 (0) 33 562-076
 Web: <http://vlada.ks.gov.ba>, E-mail: vlada@vlada.ks.gov.ba

7/7